

Landesbibliothek Oldenburg

Digitalisierung von Drucken

Die Chronica Jeuerensis

Springer, Eilerdt

Jever, 1896

Van Jurgen Menger.

urn:nbn:de:gbv:45:1-4358

Van Garlich Diuren.

Darna Is Garlich Diuren dorch radt des Greuenn vann Embdenn, vnnnd der — 4 Regenten, tho einen Amptman vp dat Huss Jeuer Angenamenn.

Garlich hefft siner sakenn nicht recht gedan, vnnnd sine behusinge tho Tayngeshusen, Alle woll vorbetert, wente he hefft eine grafft vmme sine Warffstede gemaket mit ein porthuss, Dartho hefft he de Steene vann Jeuer vnnnd Minser Kerekhoff erlanget, vnnnd wo woll de Andern nicht tho Amptluden vorordent wordenn, dennoch hefft ein Jeder sin vordeel nicht vorgetenn.

De Rustringers hebbenn soldenn ere recht tho Jeuer gesocht, sunder tho Roffhusenn, vnnnd denn Broke, so inn Rustringerlandt vorfelle, Hefft Rickleff tho Roffhusen vpgenamenn, vnnnd sine Hertstede darmede vorbetert. Desulue Rickleff hefft twe Hertstede geblotet, vnnnd tho siner Hertstede getagen, Also hebbenn de Regentenn, sampt den Vogeden, ere egen nutticheit gesocht. Auerst der Armen olderlosen Kindern vnnnd dem Lande weinich tho hertin genamenn.

Vann Herman Mengers.

Na Garlich Diuren wart Amptmann Herman Mengers vp dat Huss Jeuer, vnnnd was twe Jar by dat Ampte, Denn de Vnnndersatenn hebbenn ene gedancket, wente he hadde einen Jedern mit rechte bejgent.

Van Jurgen Mengers.

Darna wart Jurgenn Mengers tho einen Amptman gesettet vnnnd vorordent vp dat Huss Jeuer.

By disses Amptmans tidenn, hebben de Egenn Eruen Inn Rustringenn, vann Insemmerhaue, Hepense vnnnd Bandt, denn Amptman Angefallen, sampt de Regentenn, dat de Scharinger Groede, de doch



thom deele bewanet, mochte Ingediket werdenn, wovoll dem Huse Jeuer hiran thom meisten gelegenn was, wente de Groede was ein gemene Landt, welckes Alle tho dem Huse Jeuer horede, So hebbenn sick de Regentenn nicht weinich besweret, disse moye Anthonemende, Jodoch hebbenn de Rustringers so uele by denn Amptmann Angeholdenn, dat he sick hir Inne bewilliget hefft, Derhaluenn denn Amptmann vnnnd denn Regentenn de Hende woll geschmeret.

Tho behoff des gemenen Syles, hebbenn de Armenn Lude de Kerckstenders vann denn Bandt, vnnnd vann Bordenn Angetastet, Eine Klocke vann denn Bandt hebbenn de Hilligenlude tho Tettens gekofft, Dat holt vann Bordemer Kercke vnnnd Klockhuse, tho einen Sile genamen, De Regenten hebbenn mit Folf tho Inhusen gehandelt, dat men de Dike scholde Anfangenn, he wolde ock vp der Andern sidenn der Made dikenn, vnnnd des Siles haluenn sick woll vorlikenn, dat de Sil by Knipenser sidenn scholde gelecht werdenn, vnnnd wat by der Norder siden an denn Sile thobreke, vnnnd de gerechticheit thofelle, schall tho behoff des Nien Siles vallen, De Knipenser mit denn Sillensteders, de Nordersidt vnderholdenn, De Rustringers de Szuder sidt, vnnnd so scholenn de Vndersatenn ock vann Knipense, wanner de Sil brecklick worde, neuenst denn Rustringers dartho mit gelde vnnnd Arbeide na Antall eres Landes tho hulpe kamen.

Anno 1520. Inn der Vasten Is dith vorgeschreuen Arbeit angeuenn vnnnd Is bestendich gebleuenn.

Vann Sedike.

Anno 1521. Hebben de Regentenn vann denn Sedikern, vnnnd Alle sampt der Sediker sick erholdenn by den Drogen vnnnd Regentenn, dat dorch de gemene Lande de Dike is vp geschatenn, behaluenn